



**A**lbertus filius fuit strenui comitis Alberti de Hochenberg, cuius sororem Annam Rodolphus rex matrimonio habuit. Is cum esset foelici ingenio praeditus, a patre Constantiam missus fuit, ut ibi bonis literis operam daret. Ibi cum plurimum profecisset, eius cathedralis Ecclesiae canonicus factus est. earum etiam Ecclesiarum, quarum pater in Sueuia patronus erat, Rector constituitur. Inde Lutetiam profectus iuri canonico incubuit. Verum mox ex auditore professor factus, magna diligentia Decreta exposuit, & in ijs Licentiatus creatus est. In patriam rediens Argentinensis quoque canonicus eligitur. Interea Rhodolphus Constantiensis praesul moritur, in cuius locum a quibusdam Episcopus electus est. Cum autem maior pars Capituli, una cum ciuibus, patris potentiam timerent, eam Ecclesiam obtinere non potuit.